

## REGLUGERÐ

### um ráðstöfun 2.000 tonna viðbótar aflaheimilda í makríl á árinu 2017.

#### 1. gr.

Reglugerð þessi gildir um úthlutun viðbótar aflaheimilda í makríl samkvæmt ákvæði VIII til bráðabirgða í lögum nr. 116/2006, um stjórn fiskveiða.

#### 2. gr.

Úthluta skal allt að 2.000 lestum af makríl gegn greiðslu gjalds, á árinu 2017 til skipa sem eru styttri en 15 metrar að mestu lengd og minni en 30 brúttótonn að stærð, sem stunda veiðar með línu og handfærum. Heimilt er að úthluta á skip, sem hafa veiðileyfi með aflamarki eða krókaafلامarki, allt að 35 lestum í senn. Ekkert skip getur fengið úthlutað viðbótar aflaheimild fyrr en það hefur veitt 80% af úthlutuðum aflaheimildum sínum samkvæmt reglugerð nr. 295/2017 um stjórn makrílveiða íslenskra fiskiskipa árið 2017. Þessi takmörkun gildir ekki um skip sem ekki fengu úthlutun samkvæmt reglugerð nr. 295/2017 og ekki um þau skip sem fengu minni úthlutun en 27 lestir.

#### 3. gr.

Úthlutun viðbótar aflaheimilda samkvæmt þessari reglugerð er bundin því skilyrði að skip hafi veitt 80% af áður úthlutuðum viðbótar aflaheimildum.

#### 4. gr.

Aflaheimildir sem úthlutað er samkvæmt þessari reglugerð er óheimilt að framselja.

Heimilt er að flytja allt að 10% af úthlutuðum viðbótar aflaheimildum skips frá árinu 2017 til ársins 2018. Nýting aflaheimilda sem þannig eru fluttar milli ára er bundin því skilyrði að ráðherra heimili viðbótarúthlutun makrils vegna ársins 2018 skv. ákvæði VIII til bráðabirgða í lögum nr. 116/2006, um stjórn fiskveiða. Fiskistofa skal halda sérstaka skrá yfir viðbótar aflaheimildir sem fluttar eru milli ára skv. þessari grein.

#### 5. gr.

Fiskistofa annast úthlutun viðbótar aflaheimilda gegn greiðslu gjalds á grundvelli umsókna og skal vikulega úthluta aflaheimildum á grundvelli umsókna sem borist hafa undanfarandi viku. Ef umsóknir um viðbótar aflaheimildir eru umfram þær aflaheimildir sem til ráðstöfunar eru skal Fiskistofa skipta því sem til ráðstöfunar er jafnt á milli umsækjenda, enda hafi umsækjandi ekki sótt um minna magn en því nemur. Verð á viðbótar aflaheimildum í makríl frá gildistöku þessarar reglugerðar til og með 31. ágúst 2017 er 2,78 kr. fyrir hvert kg og skal það greitt Fiskistofu fyrir úthlutun. Frá og með 1. september 2017 er verðið á viðbótar aflaheimildum í makríl 3,27 kr. fyrir hvert kg. Hafi gjald ekki verið greitt í síðasta lagi á öðrum virkum degi úthlutunarviku fellur réttur útgerðar til úthlutunar á grundvelli umsóknarinnar niður.

Á heimasíðu Fiskistofu skal vikulega birta upplýsingar um magn makrils sem til ráðstöfunar er.

#### 6. gr.

Reglugerð þessi er sett samkvæmt heimild í lögum nr. 116/2006 um stjórn fiskveiða með síðari breytingum, ákvæði til bráðabirgða VIII. Reglugerðin öðlast þegar gildi. Frá sama tíma fellur úr gildi reglugerð nr. 786/2016 um ráðstöfun 2.000 tonna viðbótar aflaheimilda í makríl á árinu 2016.

*Atvinnuvega- og nýsköpunarráðuneytinu, 26. júlí 2017.*

F. h. sjávarútvegs- og landbúnaðarráðherra,

**Baldur P. Erlingsson.**

*Sigríður Norðmann.*